

Sera ya Muundo Mbadala wa Mifumo ya Haki



MIFUMO YA KITAMADUNI, ISIYO RASMI NA
MINGINEYO INAYOTUMIKA
KUPATA HAKI NCHINI KENYA
(MIFUMO MBADALA YA HAKI)

AGOSTI 2020

1.0 Utangulizi

Hakimiliki © Mahakama ya Kenya, 2020

Imechapishwa na
Mahakama ya Kenya
SLP 30041 - 00100, Nairobi Simu. +254 20 2221221

Haki zote zimehifadhiwa. Hakuna sehemu ya kitabu hiki inayoweza kunakiliwa au kusambazwa kwa namna yoyote au kwa njia yoyote ile, kielektroniki au kimitambo, ikiwemo kunakili, kurekodi au kwa mfumo wowote wa kuhifadhi na kurejesha taarifa, bila kibali kwa njia ya maandishi kutoka kwa mwandishi au kutambua asili yake isipokuwa kwa kujumuisha nukuu fupi kutoka kwa uhakiki.

Picha ya jalada: Allan Gichigi/UNODC
Kubuni na mpangilio: Amina Darani/UNODC



Funded by the
European Union



UNODC
United Nations Office on Drugs and Crime



Food and Agriculture
Organization of the
United Nations



icj
International
Commission
of Jurists
KENYAN SECTION | Since 1959



**LEGAL
RESOURCES
FOUNDATION**
Haki Itawale



Pamoja Trust
Creating Voice and Space with the Urban Poor

Chapisho hili lilitolewa kwa usaidizi wa kiufundi kutoka Afisi ya Umoja wa Mataifa wa Dawa na Uhalifu (UNODC) na kwa usaidizi wa kifedha wa Umoja wa Ulaya kupitia Mpango wa Uwezesaji wa Kisheria na Utoaji Misaada nchini Kenya (PLEAD). Yaliyomo ndani yake ni jukumu la Mahakama ya Kenya na hayaakisi maoni ya Umoja wa Ulaya au UNODC.



Sera ya Muundo Mbadala wa Mifumo ya Haki

**MIFUMO YA KITAMADUNI, ISIYO RASMI NA MINGINEYO
INAYOTUMIKA KUPATA HAKI NCHINI KENYA
(MIFUMO MBADALA YA HAKI)**

AGOSTI 2020

**Kuoanisha Mbinu za AJS na Mahakama na Katiba ya Kenya (2010)
na Mfumo wa Mahakama wa Kudumisha Mabadiliko ya Mahakama**

Akronimi na Vifupisho

ADR	Utatuzi Mbadala wa Mizozo
AJS	Mifumo Mbadala ya Haki
CEDAW	Mkataba wa Kuondoa Aina Zote za Ubaguzi Dhidi ya Wanawake
CRA	Tume ya Ugawaji Mapato
CRC	Mkataba wa Haki za Mtoto
CSO	Shirika la Kijamii la Kutetea Masuala ya Raia
CUC	Kamati ya Watumiaji Mahakama
DPP	Mkurugenzi wa Mashtaka ya Umma
GJLOS	Sekta ya Utawala, Haki, Sheria na Utaratibu
ICESCR	Mkataba wa Kimataifa wa Haki za Kiuchumi, Kijamii na Kitamaduni
ICCPR	Mkataba wa Kimataifa wa Haki za Kiraia na Kisiasa
IEBC	Tume Huru ya Uchaguzi na Mipaka
JSC	Tume ya Huduma ya Mahakama
KNCHR	Tume ya Kitaifa ya Kenya ya Haki za Binadamu
NGO	Shirika lisilo la Kiserikali
NLC	Tume ya Kitaifa ya Ardhi
NPSC	Tume ya Kitaifa ya Huduma ya Polisi
PSC	Tume ya Huduma ya Umma
SRC	Tume ya Mishahara na Marupurupu
SWOT	Uwezo, Udhaifu, Nafasi, Matishio
UDHR	Azimio la Kimataifa la Haki za Binadamu



Dibaji

Mojawapo ya kanuni za msingi zilizowekwa kwenye Katiba ili kuongoza utoaji wa haki na utekelezaji wa mamlaka ya mahakama, ni hitaji la kukumbatia njia mbadala za utatuzi wa mizozo, ikiwemo mifumo ya jadi ya utatuzi wa mizozo. Shart hili ni badiliko la kimsingi kuanzia mtazamo hadi wazo na dhana ya haki, hasa katika muktadha wetu wa Kenya. Jamii za Kenya, kwa vizazi kadhaa, zimeunda mifumo yao ya haki ambayo imekuwa na inaendelea kushikilia jamii pamoja. Huku haki inayotolewa na Mahakama ikichukua nafasi kuu katika utoaji wa haki, ukweli ni kwamba idadi kubwa ya mizozo (Sera hii inakadiria takriban asilimia 90) miongoni mwa Wakenya inatatuliwa kupitia mifumo ya haki ambayo inatofautiana na mchakato rasmi wa Mahakama. Kwa hivyo, mwongozo wa kikatiba wa kukubali na kutambua Mifumo Mbadala ya Haki unapatikana kwenye mfumo mpana wa mwitikio ambao unashughulikia, kiujumla, dhana ya haki katika muktadha wa Kenya.

Ni katika muktadha huo hapo juu ambapo mtangulizi wangu, Jaji Mkuu Mstaafu Dkt Willy Mutunga aliteua Jopokazi la mifumo ya kitamaduni, isiyo rasmi na mingineyo ya kutatua mizozo nchini Kenya. Jopo hilo lilitakiwa kuchunguza chaguzi za kikatiba, kisheria na kiseria zinazopatikana ili kutimiza matakwa kwenye Ibara ya 159 (2) ya Katiba. Muhimu zaidi, Mahakama kupitia miongozo yake muhimu (Mfumo wa Mabadiliko ya Mahakama (2011-2016) na Kudumisha Mabadiliko ya Mahakama 2017-2021) imeweka mikakati, mipango, na sera za kitaasisi ili kuzingatia na kutambua mifumo mbadala ya haki. Hivyo basi, Sera ni matokeo muhimu kwa mustakabali wa utoaji haki, na haswa, jinsi huduma za mahakama zinavyoweza kutolewa huku zikitilia maanani mchakato mpana wa utoaji haki nchini.

Hakuna shaka kwamba Mifumo Mbadala ya Haki ina matumaini makubwa katika kuimarishwa kwa upatikanaji wa haki, katika maana kamili ya dhana hiyo. Sera hiyo inatoa mapendekezo ya wazi na chaguzi zinazoweza kuhusu jinsi mfumo wa mahakama na Mifumo Mbadala ya Haki inaweza kuingiliana kwa njia ambayo inaimarisha na kulenga mfumo bora wa haki. Sera hiyo pia imebainisha hatua muhimu na za haraka za kuchukuliwa ili kusisimua kipengele hiki muhimu cha utoaji haki. Hatua hizi ni pamoja na: utambuzi wa masuala ya kuletwa chini ya AJS, udhibiti wa wahusika wa AJS, taratibu na michakato inayofaa katika AJS, uingiliaji unaofaa, na ugawaji wa rasilimali ili kusaidia mchakato huo.

Hata hivyo, ni muhimu kwamba Sera hiyo ionekane kama hatua kuu ya kuelekea katika kutimiza ajenda ya Mabadiliko ya Katiba ya Kenya ya 2010. Kupitia kuibua uwezo wa kuleta mageuzi wa Mifumo Mbadala ya Haki na kukumbatia sheria ya kijamii na kihali inayohitajika na Katiba, Sera hiyo inatoa nafasi ya mazungumzo kwa Mahakama na Mifumo Mbadala ya Haki ili kutoa maono ya mabadiliko ya Katiba ya Kenya: kugeuzwa kwa miundo inayosababisha ukandamizaji wa kijinsia; udhalimu wa kijamii na unyanyapaa; utawala wa kitamaduni; dhuluma za ugawaji na za kijamii na aina nyingine za ukandamizaji.

Sera hiyo ni mwongozo muhimu katika uendeshaji wa Mifumo Mbadala ya Haki, sio tu kwa Mahakama, bali kwa taasisi zote za sekta ya haki. Nashukuru jopo zima, chini ya uongozi wa Mhe. Jaji (Prof.) Joel Ngugi, kwa kazi hii muhimu itakayosaidia kufafanua sehemu muhimu katika utoaji haki nchini.

Mhe. Jaji David K. Maraga, EGH

Jaji Mkuu wa Jamhuri ya Kenya
na Rais wa Mahakama Kuu

Nairobi
Agosti 27, 2020

Yaliyomo

Akronimi na Vifupisho	iv
Dibaji	v
Muhtasari	viii
1.o Utangulizi	1
1.1. Usuli	1
1.2. Mchakato wa kuunda sera hiyo	1
1.3. Mtazamo wa Kihistoria	2
2.o Mantiki na Muktadha	3
2.1. Mazingira yaliyopo	3
2.2. Masharti ya Kujihusisha na AJS	3
2.2.1. Matakwa ya Katiba	3
2.2.2. Mifumo ya Kikanda na Kimataifa	3
2.2.3. Umuhimu wa AJS	4
2.2.4. Changamoto kwa Kazi za AJS	5
2.2.5. Uchanganuzi wa SWOT	6
3.o Mipango ya Sera ya AJS	7
3.1. Mfumo wa Haki za Binadamu na mbinu za AJS	7
3.1.1. Wajibu wa Kuheshimu	7
3.1.2. Wajibu wa Kulinda	7
3.1.3. Wajibu wa Kubadilisha	7
3.2. Miundo ya AJS na Mapendekezo ya Sera	7
3.2.1. Taasisi Huru za AJS	8
3.2.2. Taasisi za AJS zenye Wahusika wa Tatu Zilizo Huru:	8
3.2.3. Taasisi za AJS Zilizounganishwa na Mahakama	8
3.2.4. Taasisi za AJS Zilizodhibitiwa	8
3.3. Mwingiliano kati ya mbinu za AJS na mahakama	8
3.4. Mkakati wa Haki ya Kijamii wa AJS	9
4.o Maeneo ya Uingiliaji Kati wa Sera ya Kimkakati	10
5.o Maeneo ya Uingiliaji Kati wa Sera ya Utendakazi	11
5.1. Kubaini na Kutambua Hali ya Kesi ambazo AJS inaweza kusikiliza	11
5.2. Kuimarisha michakato ya uteuzi, uchaguzi na kuondolewa kwa wahusika wa AJS	12
5.3. Kuendeleza taratibu na sheria za Mifumo ya Haki Mbadala	12
5.4. Kuwezesha uingiliaji kati ufaao wa mwamuzi	13
5.5. Ugawaji rasilimali na uhamasishaji ulioimarishwa na endelevu	13
6.o Masuala Mtambuka	14
7.o Wahusika, Michakato na Taratibu za Utekelezaji	15
7.1. Wahusika	15
7.2. Utaratibu wa Utekelezaji	15
8.o Ufuatiliaji na Tathmini	17
9.o Uhakiki wa Sera	27
Viambatisho	18



Muhtasari

Tarehe 4 Machi 2016 aliyekuwa Jaji Mkuu, Mhe. (Dkt) Willy Mutunga aliteua Jopokazi la Mifumo Mbadala ya Haki kutathmini Mifumo mbalimbali ya Kitamaduni, Isiyo Rasmi na Mingineyo Inayotumiwa Kupata Haki Nchini Kenya (Mifumo Mbadala ya Haki) na kubuni sera ya kitaifa kuhusu Upatikanaji wa Haki. Kwa zaidi ya miaka minne, Jopokazi, ambalo muda wake uliongezwa hadi Aprili 2020 na Jaji Mkuu Mhe. David Maraga, lilifanya utafiti, kuenda nyanjani, na mashauriano ya kina na washikadau. Kazi ya Jopokazi hilo ilisababisha kuwepo kwa rasimu ya sera - *Haki kama Uhuru: Mifumo ya Kitamaduni, Isiyo Rasmi na Mingineyo ya Utatuzi wa Mizozo nchini Kenya* - ambayo hutumika kama mpango wa utekelezaji na uingiliaji kati kuanzisha Mifumo Mbadala ya Haki (AJS). Sera hii ya Muundo wa AJS (Sera) ni matokeo ya kazi ya Jopokazi.

Sera hiyo inachukulia AJS kuwa kipengele muhimu cha kupata haki na lengo lake kuu ni kutekeleza Ibara ya 159(2)(c), ambayo inaidhinisha Idara ya Mahakama, kama chombo cha Serikali, ili kukuza AJS. Katika ngazi ya kimataifa, AJS ni mfumo wa kuhakikisha upatikanaji wa haki chini ya Lengo la 16 la Maendeleo Endelevu la Umoja wa Mataifa, ambalo linawajibisha viongozi wake 'kukuza jamii zenye amani na umoja kwa ajili ya maendeleo endelevu, kuhakikisha upatikanaji wa haki kwa wote na kujenga taasisi zenye ufanisi, uwajibikaji na shirikishi katika ngazi zote'.

Mamlaka: Mamlaka ya sera ya AJS ni kutimiza matakwa ya Ibara ya 159(2) (c) ya Katiba ya (2010) na uzoefu wa kila siku wa haki wa Wakenya na kwa kufanya hivyo kupendekeza mikakati ya kujumuisha na kudumisha kazi huru za utaratibu wa AJS kwa kutumia mbinu zinazoafiki kizingiti cha Katiba ya Kenya na viwango vya kimataifa vya haki za binadamu.

Maono: Uhuru mpana, upatikanaji na matokeo ya haki yenye ushirikishwaji na usawa kwa wote nchini Kenya.

Misheni: Kuhakikisha upatikanaji wa haki kwa njia ya ufanisi kwa kuheshimu, kulinda na kubadilisha mbinu za AJS nchini Kenya.

Mipango ya Sera

Jopokazi lilitambua maeneo matano ya kimkakati ya kuingilia kati, kila moja ikiwa na shughuli zinazolingana. Hizi ni:

1. Utambuzi rasmi wa Mifumo Mbadala ya Haki na utambuzi wa aina za kesi ambazo AJS inaweza kusikiliza.
2. Kuimarisha mchakato wa uteuzi, uchaguzi na kuondolewa kwa wahusika wa AJS;
3. Maendeleo ya taratibu na sheria za kimila;
4. Uwezeshaji wa uingiliaji kati wenye ufanisi; na
5. Ugawaji na uhamasishaji wa rasilimali ulioimarishwa na endelevu.

Waraka huu wa mfumo unapaswa kusomwa pamoja na waraka mkuu, Sera ya Msingi ya Mifumo Mbadala ya Haki.

1.0 Utangulizi

1.1 Utangulizi

Mifumo Mbadala ya Haki (AJS) ni dhana ya kifalsafa na vile vile desturi ya kupata haki. Kama dhana ya kifalsafa, na inayoendana na shule ya mawazo ya haki za binadamu, imejikita katika mawazo ya kimsingi yafuatayo: uhuru, usawa, kutobaguliwa, utu na usawa. Haya yote yamo katika Katiba ya Kenya. Kama desturi ya kupata haki, AJS inarejelea hatua zinazoweza kuchukuliwa ili kufikia usawa kwa wanachama wote wa utambulisho fulani wa kitamaduni, kisiasa na kijamii. Kwa idara ya mahakama nchini Kenya, AJS imekuwa njia muhimu ya kushughulikia mrundikano wa kesi Mahakamani. Zaidi ya maswali halisi ya nambari na ufanisi, AJS ni mbinu ya kifalsafa ya kina yenye athari kubwa katika elimu ya sheria na mahusiano ya binadamu.

Mnamo tarehe 4 Machi 2016, Jopokazi la Mifumo Mbadala ya Haki lilituliwa kuangalia *Mifumo mbalimbali ya Kitamaduni, Isiyo Rasmi na Mingineyo Inayotumika Kupata Haki Nchini Kenya (Mifumo Mbadala ya Haki)*. Lengo kuu la Jopokazi lilikuwa kuchunguza mfumo wa kisheria, kisera na kitaasisi wa AJS ili kutekeleza mamlaka ya kikatiba ya Mahakama kwenye Ibara ya 159(2) (c) ambayo inaitaka Mahakama kuendeleza njia mbadala za utatuzi wa mizozo ikiwemo mifumo ya kitamaduni ya utatuzi wa mizozo. Lengo la Jopokazi lilikuwa kubuni sera ya kukuza ushirikiano thabiti na maelewano kati ya Mifumo Mbadala ya Haki na mfumo wa Mahakama, pamoja na kuimarisha upatikanaji wa haki na utoaji wa haki kwa haraka. Malengo haya yamejumuishwa kwenye mkakati wa hivi majuzi zaidi wa mahakama uliofafanuliwa katika *Mwongozo wa Mabadiliko ya Mahakama Endelevu*.

1.2 Mchakato wa Kuunda Sera

Sera hii ilitengenezwa kupitia mfululizo wa midahalo na mafunzo. Wakati jopokazi lilikusanya na kulinganisha nyenzo ambazo zimetumika kutengeneza waraka huo, hatua ya kwanza ilikuwa na sifa ya kujifunza kwa pamoja kwa wanajopokazi, watumiaji wa AJS na viongozi wa mbinu za AJS. Mawazo mengi yamejaribiwa na kutolewa maelezo muhimu katika desturi za AJS kwenye desturi za kitamaduni, pamoja na vyanzo vinavyohusishwa na mawazo ya kila siku ya haki. Maelezo ya kina zaidi ya mazungumzo haya yamenaswa kwenye waraka wa Sera ya Msingi ambayo ndiyo msingi wa sera hii ya Mfumo. Mazungumzo ya jopokazi na wahusika wa AJS yalijikita katika kuelewa, kueleza na kujadili mbinu mbalimbali za kushughulikia aina nyingi za dhuluma zinazohitaji kuangaziwa. Jopokazi liligundua eneo hili kuwa eneo lenye nguvu na gumu lililojaa mbinu shindani, dhana tofauti za haki na viwango tofauti vya utendaji. Kama vile mchakato wa kuunda sera haukuwa msingi wa jopokazi, sera imependekeza mchakato wa utekelezaji ambao ni wa mabadiliko na unaoongozwa na washikadau wote.

1.3 Mtazamo wa Kihistoria

Kabla ya uvamizi wa kikoloni, jamii nchini Kenya zilikuwa na mifumo yao ya haki. Ukoloni, hata hivyo, uliweka mifumo miwili ya haki. Mfumo mmoja, Mahakama za Wenyeji, ulitumia sheria za kimila kwa jamii za kiasili (ambazo zilijulikana kama ‘Wenyeji’) na ulishughulikia sheria za familia, umiliki wa ardhi, na masuala ya urithi. Mfumo wa pili, Mahakama za Jimbo la Kikoloni, ulitumia sheria iliyopitishwa kutoka Uingereza na mifumo mingine ya kikoloni kwa walowezi. Ingawa Serikali kuu ya kikoloni ilikusudia kuunganisha mifumo hiyo miwili ya kisheria, iliwekea mipaka matumizi ya sheria ya kimila kupitia ‘kifungu cha mkinzano, ambacho kilisema kuwa sheria ya kimila ingetumika mradi tu haikinzani na haki na maadili. Haki na maadili, mwishowe, vilitafsiriwa kutoka kwa mtazamo wa Sheria ya Kawaida ya Uingereza na Waingereza.

Mwishoni mwa utawala wa kikoloni, Katiba ya Kenya ya 1963 ilitambua mifumo ya kitamaduni ya utatuzi wa mizozo kama sehemu ya mfumo wa sheria wa baada ya ukoloni wa Kenya. Mifumo ya kitamaduni ya mizozo, hata hivyo, ilitumika tu kwa kiwango ambacho haikuwa ‘inakinzana na sheria yoyote iliyoandikwa’. Sheria ya Kimila ya Kiafrika iliwekwa kwenye safu ya chini kabisa ya ngazi ya kisheria: chini ya Katiba, Sheria za Kenya, Sheria za Waingereza za Matumizi ya Jumla, na Sheria ya Kawaida. Hata hivyo, kwa sababu Waafrika walitumia mifumo rasmi na isiyo rasmi, kuliendelea kuwa na mwingiliano mkubwa kati yao na haikuwa busara kutarajia mifumo hiyo miwili kufanya kazi ikiwa tofauti. Ilikuwa ni lazima ifanye kazi kwa pamoja na iliathiriana katika suala la mchakato na matokeo.

Katiba ya 2010 ilifufua nafasi kuu ya Sheria ya Kimila ya Afrika na mifumo ya kitamaduni kupitia Ibara ya 159(2)(c) ambayo inaipa Mahakama mamlaka ya kuendeleza mbinu za kitamaduni za utatuzi wa mizozo na wakati huohuo kuziweka mbinu hizi chini ya mfumo wa haki za binadamu wa Sheria ya Haki [Ibara ya 153(3)]. Kwa hivyo, matumizi ya “kitamaduni”, “kimila” au “mbadala” (“Mifumo Mbadala ya Haki”) imeendelea kudumu.

2.0 Mantiki na Muktadha

2.1. Mazingira Yaliyopo

Historia ya Kenya inategemea njia nyingi za kupata haki. Kuna mizozo mingi inayotokea katika maisha ya kila siku, lakini ni michache sana kati ya hiyo ambayo hutatuliwa na Mahakama rasmi. Badala yake, nyingi kati yao inatatuliwa kwa kutumia Mifumo Mbadala ya Haki (AJS). AJS ndiyo maana ya kina ya kile ambacho Katiba inarejelea katika Ibara ya 159(2)(c) kama mifumo ya kitamaduni, isiyo rasmi na mingineyo inayotumiwa kupata haki nchini Kenya. Licha ya mamlaka ya kikatiba, AJS bado haijafanywa kuwa taasisi na hakuna miongozo ya kutosha ya kisheria na kisera ya kusimamia AJS. Kwa hivyo jopokazi liliazimia kuchunguza jukumu la AJS katika msururu wa haki na kutoa mwongozo wa jinsi ya kuhakikisha kuwa mbinu za AJS zinasimamiwa kwenye maelezo ya Katiba.

Katika utafiti wao, Jopokazi liligundua kuwa AJS ni sehemu ya maisha ya kila siku ya Wakenya na inafaa katika kuongeza upatikanaji wa haki kwa watu. Mnamo 2007, utafiti wa Sekta ya Utawala, Haki, Sheria na Utaratibu (GJLOS) uligundua kuwa imani katika Mahakama iliendelea kuwa ndogo. Utafiti wa baadaye wa Idara ya Mahakama, pamoja na Taasisi ya Hague ya Ubunifu wa Sheria uligundua kuwa ni asilimia 10 pekee ya Wakenya wanaotumia mfumo rasmi wa haki kutatua mizozo yao (Tazama Utafiti wa Mahitaji ya Haki na Kuridhika Nchini Kenya, 2017). Uchunguzi wa majaribio uliofanywa na Jopokazi unaonyesha maadili muhimu ya kijamii na kitamaduni yanayozunguka AJS nchini Kenya. Kando na desturi za kila siku za AJS, ni dhahiri kwamba jamii zilizofanyiwa utafiti zimefanya jitihada za kulinda, kuhifadhi na kukuza tamaduni zao. Tafiti za nyanjani pia zilithibitisha kuwa AJS ni mbinu ambayo Wakenya kote nchini, katika maeneo ya mashambani na mijini, huiomba wanapokuwa na mizozo. Hii inatokana na faida nyingi zinazotolewa na mikutano hii, ikilinganishwa na Mahakama rasmi. Ukweli kwamba mifano hiyo imetolewa kutoka kote nchini inathibitisha kwamba mbinu hii ya utatuzi wa mizozo imeenea.

2.2. Masharti ya Kujihusisha na AJS

2.2.1 Matakwa ya Katiba

Katiba ya Kenya inaweka wajibu kwa idara ya mahakama Kukuza Mfumo Mbadala wa Haki. Pia inathibitisha maono ya kuchochea na kupanua uhuru wa raia kutumia wakala wao, kujiendesha kwa uwajibikaji na kuwafanya walio na mamlaka wawajibike kwa matendo yao. Masharti haya yamefafanuliwa kwa kina katika vifungu vingi vinavyohimiza upatikanaji wa haki kwa wote, hasa Ibara ya 10, 48, 50, 159 na 174. (Angalia Kiambatisho p. x)

2.2.2 Mifumo ya Kikanda na Kimataifa

Kenya imetia saina mikataba kadhaa ya kimataifa na kikanda ya haki za binadamu ambayo inakuza upatikanaji wa haki kwa wote. Hizi ni pamoja na Azimio la Kimataifa la Haki za Kibinadamu.

(UDHR); Mkataba wa Kimataifa wa Haki za Kiraia na Kisiasa (ICCPR); Mkataba wa Kuondoa Aina Zote za Ukatili Dhidi ya Wanawake (CEDAW); Mkataba wa Kimataifa wa Haki za Kiuchumi, Kijamii na Kiutamaduni (ICESCR); Mkataba wa Kiafrika Kuhusu Binadamu na Haki za Watu (Mkataba wa Banjul); Itifaki ya Mkataba wa Kiafrika wa Binadamu na Haki za Watu wa Haki Kuhusu Haki za Wanawake Barani Afrika (Itifaki ya Maputo); Mkataba wa Haki za Mtoto (CRC). Katiba ya Kenya ya 2010 inaweka wazi kwamba sio tu kanuni za jumla za sheria za kimataifa zinachangia sehemu ya sheria za Kenya bali pia mkataba au makubaliano yoyote yaliyoidhinishwa na Kenya.¹

2.2.3 Umuhimu wa AJS

(a) AJS inaonyesha hali halisi ya maisha ya Wakenya na ni mchakato mwafaka wa kuongeza upatikanaji wa haki kwa Wakenya wengi.

(b) AJS kama mfumo wa kupanua haki za binadamu na uhuru wa binadamu: AJS ni chombo muhimu cha kupanua haki za binadamu. Kwa sababu AJS ni uhalisia unaoishi, inabadilika na kuendana na hali mpya na ina uwezo wa kushughulikia mabadiliko ya kisheria na kwa hivyo inaendana na kanuni za haki za binadamu.

(c) AJS kama mbinu ya kutenda haki kwa njia tofauti na kwa ufanisi zaidi: AJS inatimiza hili kwa angalau njia sita - (i) haina uhasama na ni aina ya haki ya kurejesha; (ii) inahakikisha ushiriki zaidi wa kijamii kwa kuwa ni shirikishi zaidi; (iii) ni nafuu zaidi; (iv) ina urasmi na ufundi mdogo na inazingatia haki thabiti; (v) ni ya haraka zaidi; na (vi) haina uhasama na inajumuisha suluhu nyingi za kiubunifu.

(d) AJS ni mbinu mwafaka ya kupunguza mrundikano wa kesi na kupunguza msongamano wa Mahakama: Mojawapo ya masuala makuu ya mfumo rasmi wa haki nchini Kenya ni mrundikano mkubwa wa kesi. Kwa hiyo, kupunguza mrundikano katika Mahakama ni mojawapo ya malengo ya msingi ya Mahakama. Kwa kushughulika mizozo ifaayo na kuzuia kwa bidii mizozo mingine kuongezeka, AJS inapunguza msongamano wa kesi Mahakamani.

(e) AJS ni mbinu ya kuingiliana upya kijamii na (na kuhalalisha tena) Nchi: Mojawapo ya malengo ya mabadiliko ya Katiba ni kuhalalisha tena Nchi kwa kuleta Serikali karibu na wananchi. Mifumo Mbadala ya Haki huongeza ushiriki wa umma katika mfumo wa haki na hivyo kuwashirikisha tena watu na Serikali.

(f) AJS ni mbinu ya kuunda upya Serikali na Raia kama sehemu ya mradi wa kikatiba wa kuunda upya Serikali ya Kenya: AJS inalenga kuimarisha jukumu la Serikali na Raia kama wahusika wa moja kwa moja wanaochangia katika uhuru wao wa kiraia. Mamlaka nyingi za taasisi za AJS hazitokani na mamlaka zilizokabidhiwa Serikali na watu wa Kenya, badala yake, zimetoka moja kwa moja kwa wananchi. Kwa hivyo, AJS inalenga kuimarisha jukumu la Serikali na raia kama wahusika wa moja kwa moja wanaochangua katika uhuru wao wa kiraia.

(g) AJS ni njia ya kudai upya kanuni za kitamaduni na kama mradi wa kurejesha zile za kitamaduni kama za kimantiki: Mbinu ya AJS huhifadhi na kukuza tamaduni na kuzizuia kuwa “chakavu” na kwa hivyo inafaa katika maisha ya kisasa.

¹ Tazama Ibara ya 2 (5) & (6).

2.2.4 Changamoto kwa Utekelezaji wa AJS

Ingawa mbinu za AJS zinatumiwa na Wakenya wengi wanaotafuta haki, na kutekeleza jukumu la ziada kwa mifumo rasmi ya haki, zinakabiliwa na changamoto kadhaa zikiwemo:

Ukosefu wa kutambuliwa: Katiba ya Kenya ya 2010 inatambua utatuzi mbadala wa mizozo na kuinua hadhi yake hadi kanuni ya mahakama. Hata hivyo, AJS haijatambuliwa rasmi kama tawi linalosaidiana katika utoaji wa haki.

Ukosefu wa haki za kijinsia: Mbinu za AJS mara nyingi zinatawaliwa na wanaume na zinaonekana kutoa nafasi ndogo kwa wanawake kama wafanya maamuzi. Zaidi ya hayo, kwa sababu vikao vingi vya AJS ni vya wanaume, mizozo inayoathiri wanawake au wasichana inachukuliwa kuwa haiwezi kushughulikiwa kwa njia ya haki na nyeti.

Watu Waliotengwa na Walio katika Mazingira Magumu: Mbinu za AJS zinaonekana kuwatenga makundi yaliyotengwa na watu walio katika mazingira magumu.

Ukosefu wa uwajibikaji na Kudunisha Katiba: AJS haidhibitiwi na kwa hivyo haina mbinu mwafaka za uwajibikaji. AJS inaonekana kukosa haki ya kiutaratibu pamoja na kudunisha maadili na majukumu ya kikatiba, k.m. jukumu la Mkurugenzi wa Mashtaka ya Umma (DPP). Pia, kuna wasiwasi kwamba baadhi ya matokeo ya Mbinu za AJS huenda yasipatane na viwango vya kikatiba na haki za binadamu.

Sera hii inazingatia kwamba mbinu za AJS, kama vile michakato yote ya utatuzi wa mizozo, zina changamoto fulani huku ikitambua kwamba uhuru wa kufuata utamaduni na dini ya mtu ni haki ya kimsingi ya binadamu. Sera hiyo na Miongozo huruhusu uundaji wa mbinu na tafsiri mbadala ambazo zitafungua nafasi ya changamoto kwa imani za kitamaduni. Sera hiyo inaweka njia ya kutambua na kusisimua Mbinu za AJS huku ikipunguza changamoto zilizobainishwa kupitia mfumo thabiti wa haki za binadamu unaohusisha ushirikishwaji wa kina wa Mbinu za AJS pamoja na kupitishwa kwa mafundisho yanayofaa ya kubainisha ufikiaji wa mamlaka wa Mbinu za AJS pia kama mafundisho ya uendeshaji juu ya mwingiliano kati ya Mbinu za AJS na Mahakama.

2.2.5 Uchanganuzi wa Uwezo, Udhaifu, Nafasi, Matishio (SWOT)

Licha ya changamoto zinazoikabili AJS, mbinu hiyo pia ina uwezo na fursa zake ambazo zimefupishwa hapa chini katika uchanganuzi wa SWOT.

Uwezo	Udhaifu
• <u>Mahitaji na Matumizi ya juu ya AJS</u> • <u>Ufahamu wa AJS</u> • <u>Kesi za AJS zinazoendeshwa kwa lugha ya wenyeji na zinatumiwa utamaduni wa wenyeji unaoeleweka na watu</u> • <u>Inahusisha ushirikishwaji na ushiriki wa jamii</u> • <u>Kuzingatia na kutumia haki ya urejeshaji</u> • <u>AJS haina uhasama na inatoa suluhu bunifu</u> • <u>AJS ni nafuu</u> • <u>AJS ina mamlaka juu ya masuala ya kiraia na kihalifu</u>	• <u>Ukosefu wa mfumo wa kisheria na sera</u> • <u>Ukosefu wa ufadhili uliowekwa kwa AJS</u> • <u>Mtazamo wa AJS kuwabagua wanawake, watoto na watu waliotengwa</u> • <u>Ukosefu wa Uwajibikaji</u> • <u>Ukosefu wa mchakato wa uteuzi/ uchaguzi kwa wazee na wahusika wa AJS</u> • <u>Ukosefu wa Mamlaka iliyoainishwa kwa AJS</u> • <u>Ukosefu wa Mbinu za Utekelezaji</u> • <u>Baadhi ya tamaduni ni changamoto kwa viwango vya jumla vya haki za binadamu</u> • <u>Wanawake, vijana na walemavu kutengwa kwa mchakato wa kufanya uamuzi</u> • <u>Ukosefu wa nyaraka za mchakato na maamuzi</u>
Nafasi	Matishio
• <u>Katiba ya Kenya ya 2010</u> • <u>Mifumo ya Kisheria ya Kikanda na Kimataifa</u> • <u>Uratibu kati ya AJS na mfumo rasmi wa mahakama</u>	• <u>Ukosefu wa maarifa na ujumuishaji wa mfumo wa haki za binadamu na wahusika wa AJS</u> • <u>Ukosefu wa uwezo na mafunzo kwa wahusika wa AJS</u> • <u>Kufahamiana na wanaozozana kunaweza kusababisha ufiisadi au upendeleo kwa watoa maamuzi</u> • <u>Vikao vya AJS vinaweza kufanywa kuwa vya kisiasa na kubadilishwa</u> • <u>Ukosefu wa majukumu yaliyobainishwa kwa Utawala wa Kitaifa, Mambo ya Ndani na Kaunti</u>

3.0 Mipango ya Sera ya AJS

3.1. Mfumo wa Haki za Binadamu na Mbinu za AJS

Ibara ya 159(2)(c) inawajibisha Mahakama kuendeleza AJS. Hii ina maana kwamba mfumo wa AJS uliopitishwa nchini Kenya utalazimika kuingiliana na Mahakama na kwa hivyo muundo wa haki za binadamu - usawa ufaao kati ya uhuru wa raia na maadili ya kikatiba ni muhimu. AJS inapanua haki za binadamu kwa sababu mbinu zake zimeegemezwa kwenye njia tatu zenye msingi wa haki za binadamu: Ibara ya 48 ambayo inaamuru Serikali kuhakikisha upatikanaji wa haki kwa wote; Ibara ya 10 na 28 ambayo inaeleza maadili ya kitaifa na haki ya heshima; na Ibara ya 44 ambayo inasisitiza haki ya kila mtu kutumia lugha na kushiriki katika maisha ya kitamaduni anayochagua. Mfumo huu wa haki za binadamu sio tu wa kifalsafa, pia unaonyesha mazingatio ya vitendo ya AJS.

3.1.1 Wajibu wa Kuheshimu unahitaji kutoingiliwa na Serikali katika kufurahia haki na uhuru. Hili linahitaji Mahakama na vyombo vingine vya Serikali kuhakikisha kwamba hakuna kuingiliwa kwa mchakato wa AJS kuanzia mwanzo hadi mwisho. Hata hivyo, wajibu huu haukosi vikwazo - pale ambapo kuna madai ya ukiukaji wa haki za binadamu kwenye mchakato wa AJS, Mahakama na vyombo vingine vya Serikali lazima vichunguze mchakato wa AJS, lakini lazima vifanye hivyo kwa namna ambayo inaambatana na Katiba.

3.1.2 Wajibu wa Kulinda – Hili linahitaji kuundwa kwa sheria, sera na kanuni za AJS ambazo zinalinda dhidi ya ukiukaji wa haki za binadamu na kutoa suluhu kwa ukiukaji huu. Kwenye nguzo hii, Idara ya Mahakama ina wajibu wa kisheria kuchunguza mazingira ya ukiukaji wote au madai ya ukiukaji wa haki zinazolindwa katika Ibara ya 159.

3.1.3 Wajibu wa Kubadilisha – Katiba ya Kenya ni Katiba ya mabadiliko ambayo ina maana kwamba inahakikisha kuwa Serikali inatimiza wajibu wake kwa kuleta mabadiliko makubwa. Lengo la Katiba ni kuanzisha mabadiliko na mageuzi ya kijamii kwa kushughulikia ukosefu wa usawa wa kijamii uliokuwepo nchini Kenya. Hii ina maana kuwa vikwazo vya usawa wa kijamii vinapaswa kuondolewa na badala yake kuwekwa mfumo unaowezesha haki ya kijamii. Kwa hivyo, Mahakama haina budi kuhakikisha kwamba tabia ya mabadiliko ya Katiba inadumishwa katika michakato yote ya AJS wakati wote. Kuhusiana na: Taasisi huru za AJS - Mahakama lazima iweke viwango vya chini zaidi kwa wahusika wa Serikali ili kuhakikisha kuwa wanafuata maadili ya kikatiba; Wahusika wa Tatu - Mahakama inatakiwa kurekebisha mapungufu yaliyopo katika vyombo vinavyotekeleza AJS na mchakato wa AJS wenyewe; na AJS Iliyounganishwa na Mahakama - Idara ya Mahakama inahitajika kuunda na kutekeleza, kwa nia njema, Mpango wa Utekelezaji wa michakato na mbinu za AJS.

3.2. Miundo ya Mifumo Mbadala ya Haki na mapendekezo ya sera

Jopokazi lilitambua njia tofauti ambazo AJS inatekelezwa na kuziweka katika aina nne kuu (aina): Taasisi huru za AJS, Taasisi Huru za AJS za Wahusika wa Tatu,

Taasisi za AJS Zilizounganishwa na Mahakama na Taasisi za AJS Zinazodhibitiwa na kupitisha tatu za kwanza. Ifuatayo ni maelezo ya kila moja:

3.2.1. Taasisi Huru za AJS: Hii ni mifumo huru ambayo inaendeshwa na jamii. Jamii inaamua wafanya maamuzi na michakato inayopaswa kufuatwa bila kuingiliwa kati au kudhibitiwa na Serikali. Wafanya maamuzi waliochaguliwa wanatatua mizozo hii kwa kutumia sheria, kanuni na taratibu zinazoongoza jamii husika.

3.2.2. Taasisi Huru za AJS za Wahusika wa Tatu: Hizi zinaweza kuwa taasisi zilizoidhinishwa na serikali kama vile machifu, polisi, maafisa wa uangalizi, maafisa wa ustawi wa watoto, wazee wa vijiji chini ya serikali ya Kaunti, na mwenyekiti wa vikundi vya Nyumba Kumi, miongoni mwa wengine. Wanaweza pia kuwa taasisi zisizo za Kiserikali au zinazohusiana kama vile viongozi wa makanisa, Maimamu na Masheikh miongoni mwa Waislamu, pamoja na viongozi wengine wa kidini na wahusika wa makundi ya kijamii kama vile Chama, Mashirika yasiyo ya Kiserikali na CSOs. Sifa kuu ya muundo huu ni kwamba Serikali na wahusika wengine wasio wa Serikali si sehemu ya mfumo wowote wa mahakama wa Serikali au mfumo wa kimahakama.

3.2.3. Taasisi za AJS Zilizounganishwa na Mahakama: Hizi zinarejelea michakato ya AJS ambayo hutumiwa kusuluhisha mizozo nje ya Mahakama, chini ya mwongozo na ushirikishwaji mdogo wa Mahakama. Wanafanya kazi kwa karibu na maafisa wa Mahakama na Mahakama katika utatuzi wa mizozo kupitia mfumo wa rufaa kati ya Mahakama, Kamati za Watumiaji wa Mahakama (CUCs), michakato ya AJS, na washikadau wengine kama vile DPP, Afisi ya Marejeleo na Afisi ya Watoto. Mbinu hii ya utatuzi wa mizozo inahusisha mbinu zote mbili za mfumo wa kijamii na mfumo rasmi wa haki.

3.2.4. Taasisi za AJS Zinazodhibitiwa: Hizi ni mbinu za AJS zilizoundwa, kudhibitiwa, na kutekelezwa ama kikamilifu au kwa kiasi na sheria au sheria za Serikali. Mfano wa hili ni Mabaraza ya Mizozo ya Ardhi ya muda mfupi nchini Kenya.

Baada ya kubainisha aina hizi nne, Jopokazi liliidhinisha aina tatu za kwanza – Taasisi Huru za AJS, Taasisi Huru za AJS za Wahusika wa Tatu, na Taasisi za AJS Zilizounganishwa na Mahakama kama aina zinazofuata mfumo wa haki za binadamu wa AJS. Muundo wa nne, Taasisi za AJS Zinazodhibitiwa hubadilishwa kwa urahisi na zinaweza kudunisha badala ya kukuza desturi za AJS.

3.3. Mwingiliano kati ya Mbinu za AJS na Mahakama

Ibara ya 159(2)(c) ya Katiba inaitaka Mahakama kwa uwazi kuendeleza AJS kama kanuni na desturi. Ni lazima kwamba miundo mitatu ya AJS iliyopendekezwa na Jopokazi itaingiliana na mfumo rasmi wa Mahakama na mwingiliano huu utaongeza upatikanaji wa haki kwa Wakenya. Mahakama inatakiwa kuandaa vigezo na viwango vya kudhibiti mwingiliano huu. Sera hii inaidhinisha mfumo wa wajibu wa msingi wa haki, unaozingatia Kanuni Elekezi za kikatiba za wajibu wa Kuheshimu, Kulinda na Kubadilisha, kusimamia mwingiliano kati ya mifumo iliyopendekezwa na Mahakama. Kanuni hizi zinakusudiwa kufahamisha na kuongoza mchakato wa utekelezaji wa sera kwa kutoa mwongozo wa jinsi Mahakama zinavyopaswa kuingiliana na aina tatu za AJS zilizoidhinishwa.

Jopokazi lilibainisha njia tofauti ambazo AJS huwasiliana na Mahakama na kupitisha njia nne ambazo zinakubaliana na masharti ya Kikatiba kuhusu AJS na zinapaswa kutumika wakati masuala ya AJS yanapelekwa Mahakamani. Hizi ni:

3.3.1 Staha – hapa ndipo Mahakama hukagua mwenendo wa awali wa AJS na tuzo kwa usahihi wa utaratibu na uwiano pekee.

3.3.2. Utambuzi na Utekelezaji – hii hutokea wakati Mahakama inatambua tuzo au uamuzi kutoka kwa Mbinu ya AJS kama ingekuwa amri yake yenyewe kwa kuzingatia tu haki ya mhusika mmoja kutenga tuzo hiyo kwa sababu finyu sana.

3.3.3. Mwingiliano wa Kuwezesha – hii hutokea wakati tuzo au mchakato wa AJS unatumiwa kama ushahidi katika mchakato unaoendelea wa Mahakama.

3.3.4. Umoni – ambapo Mahakama inachukulia mchakato au tuzo ya awali ya AJS kama mahakama ya “hatua ya kwanza” ambapo mtu ambaye hajaridhika anaruhusiwa kukata rufaa kwa Mahakama. Mahakama, katika hali hii, hufanya uhakiki wa ukweli na sheria kama Mahakama ya kwanza ya rufaa inavyofanya.

Hata hivyo, Sera hiyo inaeleza mapendeleo ya utumizi wa Mafundisho ya Uendeshaji ya Marejeleo au Utambuzi na Utekelezaji. Pia kunaweza kuwa na matukio ambapo makubaliano ya awali ya wahusika au hali maalum za kesi hufanya mafundisho ya Mwingiliano wa Ufuatiliaji au Uwezesaji kufaa.

3.4 Mkakati wa Haki ya Kijamii wa AJS

Tangu kutangazwa kwa Katiba ya Kenya mwaka wa 2010, haki ya kijamii imesonga mbele na kuwa kanuni kuu na ya thamani kati ya watu binafsi au vikundi na jamii. Sera hii kwa hiyo inatoa fursa ya kuanzisha mazungumzo kati ya watoa huduma wa AJS na uelewa wa watumiaji kuhusu haki ya kijamii—iliyojengwa kutokana na ushirikiano wa muda mrefu na watu wanaokabiliwa na umaskini, matatizo ya kijinsia, ukosefu wa haki, ukandamizaji, unyanyapaa na ubaguzi—na masuala muhimu na ya kijamii inayohusika na kuendeleza dhana na kanuni za haki ya kijamii. Jopokazi la AJS liligundua kuwa mbinu za AJS na sheria za kijamii zinazotumiwa na Mahakama nchini Kenya zimechangia pakubwa katika kulinda na kuendeleza maono ya mabadiliko ya Katiba ya Kenya ya uhuru, demokrasia, nadharia za usambazaji na haki, na desturi ambazo zinabadilisha miundo ya kijamii zinazoendeleza ukandamizaji, ubaguzi na unyanyapaa hasa sheria za kijamii kwa wanawake, tamaduni ndogo na raia wengine katika hali hatari. Matumizi mahususi ya mabadiliko kama wajibu kwa Idara ya Mahakama na mfumo wa AJS ni hitaji la wazi ambalo kama wahusika muhimu, mbinu za AJS na Mahakama nchini Kenya zinafaa kuchangia katika haki ya kijamii.

4.0 Maeneo ya Uingiliaji kati wa Sera ya Kimkakati

Licha ya ukweli huu na jukumu muhimu sana ambalo AJS inatekeleza katika kupata haki, na licha ya sharti la kikatiba katika Ibara ya 159, ambayo inatoa fursa kwa Kenya kuendeleza njia mbadala za utatuji wa mizozo, Kenya haijatarisha sera na mfumo wa kisheria wa kupitishwa na utekelezaji wa mbinu za kitamaduni za haki. Kwa hivyo kazi ya Jopakazi ilikuwa kuunda mbinu ya AJS ambayo ilifanya kazi kwa wakati mmoja na Katiba ambayo kwayo sera inaweza kuundwa.

Hatua mahususi za kimkakati za Sera hii ya AJS ni:

- a. Uingiliaji kati wa kimkakati wa 1: Utambuzi rasmi wa Mbinu Mbadala za Haki na utambuzi wa aina za kesi ambazo Mbinu za AJS zinaweza kusikiliza.
- b. Uingiliaji kati wa kimkakati wa 2: Kuimarisha michakato ya uteuzi, uchaguzi na kuondolewa kwa wahusika wa AJS.
- c. Uingiliaji kati wa kimkakati wa 3: Kuunda Taratibu na Sheria za Kimila.
- d. Uingiliaji kati wa kimkakati wa 4: Kuwezesha uingiliaji kati wenye Ufanisi.
- e. Uingiliaji kati wa kimkakati wa 5: Ugawaji na Uhamasishaji wa Rasilimali Imara na Endelevu

5.0 Maeneo ya Uingiliaji kati wa Sera ya Utendakazi

5.1 Utambuzi wa Aina za Kesi ambazo AJS inaweza Kusikiliza

Kauli ya Sera:

Mahakama itatambua rasmi Mifumo Mbadala ya Haki kama chombo cha kupata haki na kupanua upeo wa AJS kwa ajili ya kutoa spektra kamili ya upatikanaji wa haki huku ikihakikisha kuwa kuna ulinzi ambao utatambua haki za watu binafsi wanaotafuta haki.

Uingiliaji kati:

- a. Kubuni na kutekeleza mfumo unaokuza mwingiliano unaofaa kati ya Idara ya Mahakama na miundo mbalimbali ya AJS ili kutekeleza mamlaka ya kikatiba ambayo inakuza matumizi ya mbinu mbadala za haki.
- b. Muhtasari na miongozo ya gazeti la serikali inayotambua na kupitisha miundo mitatu ya AJS ambayo ni:
 - i. Taasisi Huru za AJS
 - ii. Taasisi Huru za AJS za Wahusika wa Tatu
 - iii. Taasisi za AJS Zilizounganishwa na Mahakama
- c. Kukuza AJS kama jukwaa la kwanza kwa kesi zinazofaa.
- d. Kutengeneza na kusambaza taarifa kuhusu mamlaka ya AJS
- e. Kuunganisha maafikiano yanayoibuka kuhusu vipengele mbalimbali vya AJS vilivyoainishwa kwenye Sera kwa nia ya kubainisha ikiwa sheria inapendekezwa kama njia bora ya kuongoza ulinzi, heshima na mabadiliko ya AJS nchini, na ikiwa ni hivyo kuendeleza sheria hiyo.
- f. Kuunda mfumo wa kuwezesha ushirikiano unaofaa kati ya Mahakama na Mbinu za AJS ili kuwezesha marejeleo ya pamoja ya kesi kati yao.
- g. Kuwafunza Maafisa wa Mahakama kuhusu utumiaji ufao wa kanuni ya wakala kuhusu mamlaka ya Mbinu za AJS na mafunzo ya uendeshaji ya mwingiliano.
- h. Kuwafunza Wahusika wa AJS na umma kuhusu mamlaka yanayofaa ya Mbinu za AJS.
- i. Kukagua na kupendekeza uwezekano wa kukaguliwa kwa sheria zilizopo na miongozo ya mahakama ili kuhakikisha utekelezaji thabiti wa sera ya AJS.
- j. Kuunda na kupitisha miongozo ya Watumiaji ya AJS kwa washikadau wote.

5.2 Kuimarisha Michakato ya Uteuzi, Uchaguzi na Kuondolewa kwa Wahusika wa AJS

Kauli ya Sera:

Mahakama kwa ushirikiano na mashirika mengine ya serikali katika sekta ya haki itafanya kazi kwa ushirikiano na mbinu za AJS ili kuimarisha uwezo na uwajibikaji wa wahusika wa AJS na maafisa wa mahakama.

Uingiliaji kati:

- Kunzisha mifumo yenye malengo ambayo inahakikisha vikao vya AJS vinavyojumuisha wote.
- Kuunda michakato ifaayo ya kutuma maombi na viwango vya kustahiki ili kuhakikisha kujumuishwa kwa wanawake, vijana na watu wenye ulemavu kama wahusika wa AJS.
- Kuimarisha uwezo na kuwawezesha wahusika wa AJS na maafisa wa mahakama katika utendakazi na kanuni za kimsingi zinazogusa masuala muhimu mbalimbali.
- Kuunda taratibu na miongozo kuhusu kanuni za Katiba na viwango vya haki za binadamu kwa wahusika wa AJS.
- Kuweka mfumo wa uhakikisho wa ubora na kidhibiti kwa wahusika wa AJS.

5.3 Kuendeleza Taratibu na Sheria za AJS

Kauli ya Sera:

Mbinu za AJS na mahakama zitashirikiana kutoa haki kuu na ya kiutaratibu, kupitia matumizi ya sheria ya kitamaduni kwa kufuata Katiba na kanuni za haki za binadamu.

Uingiliaji kati:

- Kutambua desturi za kitamaduni na kijamii zinazokinzana na Katiba na viwango vya haki za binadamu.
- Kutekeleza AJS kupitia uundaji wa Miongozo ya Kawaida ya Taratibu za Uendeshaji ambayo itaimarisha utiifu wa Katiba na kanuni za haki za binadamu.
- Kuwezesha kupitishwa kwa Mafundisho yafuatayo ya Uendeshaji ya mwingiliano kati ya Mahakama na michakato ya AJS: Uadilifu, Utambuzi na Utekelezaji, Mwingiliano wenye Uwezeshaji, na Muunganisho.
- Kwa kutumia sheria linganishi, kutengeneza hatua za kujihusisha na kifungu cha mkinzano na kuipa maana ambayo inaendana na mwelekeo wa Katiba.

5.4 Kuwezesha Uingiliaji kati Ufaao wa Mwamuzi

Kauli ya Sera:

Watu wote au makundi na jamii zinazotumia mbinu za AJS zina haki ya kuwakilishwa.

Uingiliaji kati:

- a. Kuunda na kupitisha miongozo kwa waamuzi.
- b. Kuunda Kanuni za Maadili na kuhakikisha kuwa wahusika wote wa AJS walioidhinishwa nchini wana ujuzi unaohitajika ili kutoa huduma hizo kitaalamu na kimaadili.
- c. Kuunda miundombinu ili kuhimiza matumizi ya waamuzi.

5.5. Ugawaji Rasilimali na Uhamasishaji Ulioimarishwa na Endelevu

Kauli ya Sera:

Serikali kwa kushirikiana na washikadau wengine itawezesha ukusanyaji na usimamizi wa rasilimali kwa ajili ya kuendeleza na kuimarisha mbinu za AJS.

Uingiliaji kati:

- a. Kukuza falsafa ya kujikimu kwa mbinu za AJS
- b. Kuunda bajeti inayolenga mbinu za AJS.
- c. Kutumia rasilimali za nyumbani.
- d. Kuimarisha uratibu wa uhamasishaji wa rasilimali miongoni mwa wahusika mbalimbali, wakiwemo washirika wa pande nyingi na wa pande mbili.

6.0 Masuala Mtambuka

Sera hii inazingatia masuala ibuka na mtambuka katika mbinu za AJS. Hizi ni pamoja na; jinsia na usawa, watoto, watu waliotengwa na walio katika mazingira magumu na haki za binadamu.

Kauli ya Sera:

Serikali itakuza na kuimarisha ujumuishaji wa masuala ibuka na muhimu katika sheria, sera na mbinu za AJS.

Uingiliaji kati:

- a. Kuunda mikakati ya kujumuisha masuala muhimu katika juhudi zote za AJS.
- b. Kuunda mfumo wa ufuatiliaji, tathmini na utoaji taarifa ili kufuatilia maendeleo katika ujumuishaji wa masuala muhimu na yanayojitokeza.

7.0 Wahusika, Michakato na Mbinu za Utekelezaji

Sera hii inatambua jukumu la washirika tofauti katika kukuza na kuimarisha mbinu za AJS. Washirika hawa ni pamoja na wahusika wa Serikali na wasio wa Serikali

7.1. Wahusika

7.1.1 Wahusika wa Serikali

Wahusika hawa ni pamoja na Mahakama na CUC, DPP, Taasisi za Ibara ya 15 - KNHRC, NLC, IEBC, PSC, JSC, CRA, SRC, NPSC. Jukumu la wahusika hawa katika utekelezaji wa sera litakuwa:

- Kutoa uongozi, usimamizi na mwelekeo wa sera
- Kuhakikisha kuwepo kwa mifumo ya kutosha ya kisera, kisheria na kitaasisi
- Kuhakikisha utekelezaji wa sera na miongozo kwa njia iliyoratibiwa na iliyounganishwa
- Kuweka, kudumisha na kuhakikisha viwango na taaluma katika desturi ya AJS
- Kuwezesha ushirikiano mzuri katika utekelezaji wa mbinu za AJS
- Kuhakikisha kwamba jamii zinafahamu haki zao kwenye mbinu za AJS
- Kuhakikisha upatikanaji wa msaada muhimu wa jamii na miundombinu
- Kuunda njia za kupokea maoni na uwajibikaji
- Kuunda na kuwezesha uwezo kwa ajili ya kupanga, kutekeleza, ufuatiliaji na usimamizi wa mbinu za AJS

7.1.2 Wahusika wasio wa Serikali

Hawa ni pamoja na; CSOs, Baraza la Wazee na taasisi za haki za jamii, wanasheria, wasaidizi wa kisheria, wasomi na washirika wa maendeleo. Jukumu lao katika utekelezaji wa sera litakuwa:

- Kutoa usaidizi wa ziada wa kifedha na kiufundi kwa mbinu za AJS
- Kufanya usawazishaji kwa serikali ili kuhakikisha utekelezaji wa sera
- Kuhakikisha ujumuishaji wa aina zote za jamii na vikundi vilivyo katika hali ngumu
- Kupongeza juhudi za serikali.

7.2. Mbinu za Utekelezaji

Ili kuongoza utekelezaji wa Sera ya AJS, wahusika wa Serikali kwa kushirikiana na wahusika wasio wa Serikali wataunda Mfumo wa Kitaasisi. Mfumo huo wa Kitaasisi utaeleza kwa kina mikakati hiyo; shughuli; jamii lengwa; muda uliopangwa; makadirio ya gharama na wadau husika.

Utekelezaji utahitaji ushiriki na usaidizi kutoka kwa serikali, jamii na wahusika wengine wasio wa Serikali wanaokuza maendeleo ya jamii. Mashirika husika ya utekelezaji yatatayarisha mipango ya kazi inayoelezea kwa kina juhudi zao kama ilivyoainishwa katika sera hii.

7.2.1 Usimamizi wa Sekta ya AJS

Jopokazi linapendekeza kuwa katika kazi ya kuchunga na kufuatilia utekelezaji wa Sera, Mahakama inaunda na kuteua Kamati ya Kudumu ya Mfumo Mbadala wa Haki. Inatarajiwa kuwa majukumu makuu ya Kamati ya Kudumu katika miaka minne ya kwanza yatakuwa yafuatayo:

1. Kwanza, kutekeleza jukumu la kimsingi la kuongoza ushirikishwaji wa haki za binadamu unaokusudiwa katika Sera hii kama njia ya kubadilisha Mifumo Mbadala ya Haki nchini Kenya kwa kuwapa uwezo wahusika mbalimbali - hasa Mbinu za AJS - kwenye Mfumo wa Haki za Kibinadamu na mahitaji ya chini ya kikatiba. pamoja na kukuza mazungumzo kati ya Maafisa wa Mahakama na waingiliaji wao juu ya mamlaka ya mazungumzo na kijamii inayohitajika ili kutimiza mamlaka ya Mahakama chini ya Wajibu wa Haki za Kibinadamu uliowasilishwa katika Sera hii kama njia ya kulinda na kuendeleza maono ya mabadiliko ya Katiba ya Kenya ya uhuru, usawa jumishi, demokrasia, haki ya ugawaji na upataji haki, na desturi ambazo zinabadilisha miundo ya kijamii ambayo inaendeleza dhuluma, ubaguzi na unyanyapaa;
2. Pili, kujumuisha maafikiano yanayojitokeza kuhusu vipengele mbalimbali vya AJS vilivyoinishwa katika Sera hii kwa nia ya kubainisha ikiwa sheria inapendekezwa kama njia bora ya kuongoza ulinzi, heshima na mabadiliko ya AJS nchini;
3. Tatu, kuongoza na kuunda mazungumzo kuhusu AJS nchini Kenya na kufuatilia na kupanga ramani ya maendeleo na urejeshaji nyuma (ikiwa upo) na panapofaa kuwa kama nyenzo katika nyanja hiyo na pia kusaidia wahusika mbalimbali katika kutekeleza Sera hii katika kutimiza majukumu yao ya kulinda, kuheshimu na kubadilisha AJS; na
4. Nne, kuhamasisha na kuboresha rasilimali ili kufanya kazi tatu zilizoko hapo juu.

7.2.2 Usimamizi wa Wadau na Uhusiano na NCAJ

Jopokazi linapendekeza kwamba Kamati ya Kudumu iwekwe katika Taasisi ya Mafunzo ya Mahakama (JTI) kwa kuzingatia mamlaka kuu ya kubadilisha Mahakama kupitia mafunzo, ushirikiano muhimu (na wahusika wengine katika sekta ya haki) na uundaji wa sera. Inapendekezwa zaidi kwamba Kamati ya Kudumu iwe na sharti rasmi la kutoa taarifa kwa Mheshimiwa Jaji Mkuu mara mbili kwa mwaka. Mwisho, inapendekezwa kuwa kutokana na wadau waliohusika katika mradi wa kusisimua AJS kwenye maono ya Katiba, Mheshimiwa Jaji Mkuu awasilishe rasmi taarifa za Kamati ya Kudumu mbele ya Baraza la Kitaifa la Usimamizi wa Haki (NCAJ) kwa ajili ya kujadiliwa na uwezekano wa hatua zinazofaa.

8.0 Ufuatiliaji na Tathmini

Mkakati wa ufuatiliaji na tathmini utatayarishwa ili kuidhinishwa na Mahakama kutoa tathmini ya utaratibu na endelevu na wadau kuhusu maendeleo yaliyopatikana katika utekelezaji wa Sera na Miongozo ya AJS. Mkakati wa ufuatiliaji na tathmini utakuwa kipengele kilichojengwa ndani ya Miongozo na itaainisha majukumu mahususi, kazi na wajibu mahususi wa wahusika mbalimbali wa Serikali na wasio wa Serikali kuhusu ukusanyaji na uwasilishaji wa taarifa kwa Mahakama.

9.0 Uhakiki wa Sera

Sera hii itahakikiwa upya baada ya miaka minne (4) ili kutathmini maendeleo yaliyofikiwa katika utekelezaji. Mchakato huu utafanyika kwa njia shirikishi na kwa ushirikiano na wadau wengine.

Viambatisho

Jedwali la 1. Mfumo wa Kisheria wa Kimataifa

Hati rasmi	Muhtasari
Azimio la Kimataifa la Haki za Binadamu (UDHR)	Ibara ya 8 inahakikisha usawa kamili kwa usikilizaji wa haki na wa hadhara unaofanywa na mahakama huru na isiyo na upendeleo katika kubainisha haki na wajibu.
Mkataba wa Kimataifa wa Haki za Kiraia na Kisiasa (ICCPR)	Ibara ya 2(3) ya ICCPR inahitaji suluhu ya ufanisi kwa mamlaka husika. Ibara ya 14 inahakikisha haki ya usawa mbele ya Mahakama na mabaraza na kusikilizwa kwa haki. Ibara ya 26, watu wote wako sawa mbele ya mahakama na wana haki sawa ya kupata ulinzi na manufaa ya sheria bila ubaguzi wowote.
Mkataba wa Kuondoa Aina Zote za Ubaguzi Dhidi ya Wanawake (CEDAW)	Ibara ya 2(b) inaagiza wahusika wa serikali kupitisha ipasavyo Sheria na hatua nyinginezo ili kuzuia ubaguzi dhidi ya wanawake. Ibara ya 2(c) inawawajibisha wahusika wa serikali kuweka ulinzi wa kisheria wa haki za wanawake kwa misingi sawa na wanaume. Ibara ya 15(1), wahusika wa serikali watawapa wanawake usawa kama wanaume mbele ya sheria. Ibara ya 15(2), wahusika wa serikali watahakikisha wanawake walioko katika masuala ya kiraia wana uwezo wa kisheria sawa na wanaume na nafasi sawa za kutekeleza mamlaka hiyo.
Mkataba wa Haki za Mtoto (CRC)	Ibara ya 3(1) inaeleza kuwa maslahi ya mtoto yatazingatiwa kwanza katika matukio yote yanayomhusu mtoto.

Jedwali la 2. Mfumo wa Kikanda wa Afrika

Mkataba wa Kiafrika wa (Banjul) kuhusu Binadamu na Haki za Watu ('Mkataba wa Banjul')	Ibara ya 3 inahakikisha usawa kwa kila mtu mbele ya sheria na ulinzi wa sheria.
Itifaki ya Mkataba wa Kiafrika Kuhusu Haki za Wanawake Barani Afrika (Itifaki ya Maputo)	Inaelezea haki muhimu za kiuratibu ili kuhakikisha kuwa wanawake wanasikika katika uchunguzi unaoendelea na urekebishaji wa matukio ya kitamaduni na sheria za kimila.

Mkataba wa Kimataifa Kuhusu
Haki za Kiuchumi, Kijamii na
Kitamaduni (ICESCR)

Ibara ya 17(2) inaeleza haki ya kila mtu kushiriki katika
maisha ya kitamaduni ya jamii yao.

Jedwali la 3. Mfumo wa Kikanda wa Afrika

Katiba

Ibara ya 10 inaweka maadili ya kitaifa na kanuni za utawala ambazo ni pamoja na, heshima ya binadamu na haki ya kijamii; kanuni mbili zinazounda uti wa mgongo wa AJS yenye mabadiliko.

Ibara ya 11 inatambua utamaduni kama msingi wa taifa na kama mkusanyiko wa ustaarabu wa Wakenya na taifa la Kenya.

Ibara ya 27(1) inahakikisha usawa mbele ya sheria na haki ya kulindwa kwa usawa na manufaa sawa ya sheria.

Ibara ya 44 inawapa watu haki ya kutumia lugha na kushiriki katika maisha ya kitamaduni wanayochagua. Hii inajumuisha haki, pamoja na wanachama wengine wa jamii hiyo, kufurahia utamaduni wa mtu huyo na kutumia lugha ya mtu huyo au kuunda, kujiunga na kudumisha vyama vya kitamaduni na lugha na vyombo vingine vya asasi za kiraia.

Ibara ya 48 inalazimisha Serikali kuhakikisha upatikanaji wa haki kwa watu wote.

Ibara ya 50 inahakikisha haki ya mizozo kutatuliwa kwa usikilizaji wa haki na wa hadhara mbele ya Mahakama au baraza huru na lisilopendelea upande wowote.

Ibara ya 159 inataja ADR na Mifumo ya Kitamaduni ya Haki ili kuimarisha upatikanaji wa haki. 159(2)(c) inaweka wajibu wa wazi kwa Mahakama kuendeleza njia mbadala za utatuzi wa mizozo, ikiwa ni pamoja na njia za kitamaduni za utatuzi wa mizozo.

Ibara ya 174 (d) inatambua haki ya jamii kusimamia mambo yao; na (e) kulinda na kuendeleza maslahi na haki za walio wachache na jamii zilizotengwa.

Sheria ya Mahakama

Sehemu ya 3(2) - Mahakama ya Juu, Mahakama ya Rufaa, Mahakama Kuu, Mahakama ya Mazingira na Ardhi, Mahakama ya Ajira na Mahusiano ya Kazi na Mahakama zote zilizo chini yake zitaongozwa na sheria za kimila za Kiafrika katika kesi za madai ambapo mhusika mmoja au zaidi yuko chini yake au ameathiriwa nayo, kwa kadri inavyotumika na haikinzani na haki na maadili au kutofautiana na sheria yoyote iliyoandikwa, na itaamua kesi zote kama hizo kulingana na haki kuu bila kuzingatia utaalumu wa kiutaratibu na bila kucheleweshwa kusikostahili.


Sheria ya Watoto

Inakataza desturi za kitamaduni zinazodhalilisha utu au kudhuru ustawi wa kimwili na kiakili wa mtoto.

Sheria ya Serikali za Kaunti

Sehemu ya 98, 99, 100 & 101 inahusu elimu ya uraia inayolenga uwezesaji wa wananchi. Sehemu ya 99(f) inaorodhesha mojawapo ya malengo ya elimu ya uraia ni kujenga uelewa kuhusu mswada wa haki miongoni mwa mambo mengine, mpango muhimu kwa ajili ya kutimiza haki ya kupata haki katika hali ya kujua. Hii inaweka wajibu kwa serikali za kaunti husika kutoa elimu kwa umma katika kaunti.

SERA YA MUUNDO MBADALA WA MFUMO WA HAKI




Masharti




Muundo wa Haki za Binadamu za AJS





Miundo ya Mwingiliano wa Mahakama



Shukurani

Shukurani za kipekee kwa Taasisi ya Denmark ya Haki za Binadamu kwa kuwezesha mchakato wa kutafsiri sera ya AJS ili kuboresha uzoefu wa mafunzo kwa kutoa chaguo zaidi za lugha ya sera hii.

**THE DANISH
INSTITUTE FOR
HUMAN RIGHTS**



Mahakama ya Kenya
SLP 30041 - 00100, Nairobi
Simu. +254 20 2221221

-  www.judiciary.go.ke
-  www.ajskkenya.or.ke
-  [@thejudiciarykenya](https://www.facebook.com/thejudiciarykenya)
-  [@Kenyajudiciary](https://twitter.com/Kenyajudiciary)

